

列傳中卷十一

高行

後漢

閔貢太原人客居安邑家貧日市猪肝一片屠者或不肯邑令聞之飭吏常給貢聞歎曰豈可以口腹累邑令耶遂去客沛建武中以博士徵不至時人高其行與周黨並以介節稱孟舊屬太原故採入

宋

張象仁魏子登熙甯進士授校書郎時值多故上便宜五事忤旨落職隱白鹿山不交當道五十餘年卒於家

金

趙泰字仲通博綜經史不干仕進年強仕當道辟爲兵部奏差泰曰吾家世以敦樸勤力訓子弟一旦入仕途恐漸競浮靡非福也辭不就務農勸讀賙恤貧乏鄉里重之

元

鄭忠字蓋臣工文翰有勸以仕者忠曰吾昕夕與古爲徒何以仕爲頗好詞賦所作不下千篇及卒謂子洽曰吾聊以自娛耳無補於世悉焚之後洽登第累官觀文殿學士贈忠如其官

明

樊琮字佩章英敏有材識未冠補邑庠援例入太學授河南唐縣縣丞勤廉有爲性剛不枉道以求合報罷起爲中部丞不易所守無幾棄官歸

趙綱少穎悟領洪武丙子鄉薦累官工部員外郎剛介寡合爲同官中傷謫下江知縣冰操益厲上官每苛索之義不屈乞休歸里終身不出

張翰才字育甫登隆慶辛未進士第授井陘令秉正不阿遭艱歸民立祠祀之補新安供億無甯暑翰才毅然曰疲民以逐津要吾不忍爲悉罷之民賴以安而中官

絡繹需索不遂報左遷卒於官

張廣字文博王子性伉直每面斥人過由廩生入太學授洛川主簿廣席祖父業家頗饒攜千金赴官一介不以累民大有聲時令以賄聞廣輒面諫令怒廣亦不顧卒以事中傷罷歸

溫良字從善少聰慧有奇氣未冠游庠因遭多難不欲仕棄諸生隱於北鄙不聞世事者二十餘年時詔求遺賢有司欲以良應詔乃盲一目以示不可用

柳應時性耿介有淮安人貿易於孟以二百金寄應時而卒年餘其子來扶輓不知也應時手授之封識如故

李騰霄字子冲號鹿泉登嘉靖癸未進士第由戶曹出守廣平性明決均徭平賦釐剔奸弊士民懷之以不阿權貴解組歸祀名宦及本邑鄉賢

李源性樸實鄰封有失馬者誤認源馬源卽與之無愠色後鄰封人得所失馬還源馬感謝亦無喜色鄉人兩賢之

楊一魁字近泉少孤母撫之稍長以經紀博甘旨萬厯間客遼東兵且至有笄女自媒且言有三百金一魁弗許爲訪其親歸之後以老乏嗣買妾入門涕泣不止一魁會意呼其父領去令擇年甲相當者嫁之不索值晚

舉一子名應極弱冠游庠孫光武舉次苾縣丞三莊武  
舉任浙江瑞安千總

柳鎔字鑄我庠生一先子孟人壽陽籍循例入太學候  
補州判性孝友甲申闖寇據晉鎔弟錦以舊爲平山令  
父子繫獄勒助餉錦故貧鎔曰吾不能代弟完餉忍令  
弟父子俱斃乎今吾子淑孔較弟子稍長當令代白於  
賊賊許之淑孔亦慷慨入圍土適我朝兵至得俱釋  
趙文斗字仰北少穎敏經史百家過目不忘倜儻善詠  
諧出口卽成韻語領崇禎癸酉鄉薦任東鹿令旋告歸  
閉戶讀書足不履城市者三十餘年

張洎六策子字雪已號剩人明末爲諸生生平敦節義  
寡交游博學多聞爲文頗有奇氣嘗作迎暉門外武  
廟神聯以寓意其一曰書絕骨氣丈夫劣史難良史亦  
難任是瞽臣腐令等筆狀不出硃礪千端腕誣且漫嘲  
陳壽服真血性漢子正人摯姦人同摯豈獨嚼齒涅背  
諸公信得過淋漓一點心折先須問魏瞞其二曰天上  
日人中心痛發兩言後雖當天老人枯義掌常留曩代  
赤薇爲毛石作骨挺生一塊間便使薇窮石裂墨魂同  
守故鄉青筆墨籠蓋一切吉光片羽可想其概時逆闖  
犯闕恥爲所辱易緇衣放情山水莫知所終

國朝

張金榜一麟子字魁宇十五游庠有客寄數百金於其家十餘年始來啟笥封誌如故客義之子盛養廩生孫曦武舉瞻鎮遠守備

武遠聲字四達讀書不干仕進通星緯象數之學嘗北遊塞上拾囊金乃健兒所領糧餉邂逅酒家還之子全文成進士官刑部正郎封遠聲如其官年八十二卒

李樗呈素子字蒼摩以歲貢任太谷訓導陞臨汾教諭平生慎名節爲諸生時偶過村落有寡妾改嫁請樗立婚書許酬樗曰此何等事而我舉筆耶不顧而去

王傲古字又彭歲貢生秉性廉介物非應得一毫莫取  
少失怙恃育於兄及長事兄如父舉鄉飲正賓卒

史紹唐庠生勵廉隅邑令孔重其品有雀角者乞憐於  
令詞連史生令曰當以一言爲信其人深夜賄紹唐正  
色拒之曰獨不聞楊伯起四知之戒乎卒不爲理施黃  
峪村田租廿餘石爲文昌閣歲修舉鄉賓卒

高永貴居仙人村讀書穎敏不求聞達每獨步巒壑怡  
情山水詩酒琴書泊如也

樊康侯霽父也性忼爽邑人邢纘祖敏悟而貪欲廢學  
康侯命受業於霽不責俸且飲助之纘祖以乾隆庚午

登賢書今捧檄治民矣康侯八十餘卒

鄭之魁字三秀性耿介不欺然諾嘗假江南周某銀若干及賁還適周卒家人不知却不受同事皆勸令收回之魁曰我豈以生死昧良耶乃告於周之靈而委焉居常廣市丸散施貧病子孫踵行之雍正二年舉鄉賓子國瑜字懷瑾性孝嘗兼程走二百里取晉祠水療父疾二子出嗣伯叔兄仍給已產周族鄰惠行路不惜多金亦舉鄉飲庶老子孫入鄉學國學十餘人

姜公弼字元輔增廣生重義友人侯某遭難莫支謀於公弼憐之而無以爲贈有薄田十餘畝是累年束脩之

所積也。鬻以資其用。後侯氏子庠生寅恆稱頌不置云。  
趙良字善長。法忤子恩貢生篤行孝友。陪貢時正貢某  
以訟事牽繫。令憾之。欲俾良良曰。俟案結。某果有罪。則  
無能爲力。否則不願乘人之危而攘之也。後某事白得。  
貢士林義之。嘗設帳於本邑尊閭。署論文校藝。而外無  
片言及私。

姜士端字肅公。家貧。十三四時日覓微利以養親。夜則  
苦讀不倦。十九游庠。旋食餽舌耕爲業。四壁蕭然。而義  
利之界極慎。

姜雲鵬字程九。庠生。好義。有族子某趁食外出。不知存

亡妻無以度日母家欲嫁之事垂成雲鵬作僞書并白  
鏹數金送其家妻得之乃守以待後數月族子某果至  
魏瀚幼失怙恃依依二兄姊適王氏二載夫故乏嗣貧  
無以贍朝夕瀚力勸守節衣食薪水不缺於供者四十  
餘年姊卒爲殯葬

李盛林考授吏目有族人鬻子而婦痛不欲生者盛林  
出錢贖之先遺祭田久廢盛林倡族衆興復

樊昇睿凡子監生有表戚貧鬻妻昇聞之勸曰爾不過  
爲衣食累耳得錢數緡可以生理度日也賙之

王璐康熙癸巳舉人輕財尙義鄉有貧至鬻女者歸自

館中罄脩金贖之不少吝壽陽典史某子約婚守備某女典史罷守備遂欲寒盟璐百計勸成賣馬輸銀以完其婚後仕爲瀘溪縣知縣卒

以上舊志

鄭潤章字雨亭東關人領道光乙酉鄉薦少時家赤貧事寡母隆冬無棉絮入泮後以學田餬口每日五更起躬詣窰場負取煤炭門人知之奉以柴米卻弗受乙未大挑二等授翼城縣教諭十餘年告歸卒

田興兆字吉占北關人邑庠生自幼勵名節堂兄興德司鐸太平兆隨任讀書學使黃案臨平陽兄以其有世誼試使謁之預爲采芹地兆曰父兄責望良奢奈何初

進身遂欲依人門戶兄嘉其意不之強爲文不趨時尙  
遊泮後屢躋名場遂無意進取晚年閉門掃軌惟優游  
圖書而已

善行義舉

元

韓嗣家素封至元間歲饑嗣出粟賑濟活人甚衆後率以爲常鄉人賢之

張聚崇嗣後也登進士第居鄉恂恂守儒素風家三百餘口同居無間言未仕終

胡永字大年值世亂勤於田事鄉鄰貧苦者恆賙給之或死喪不能舉必力爲營辦以子輔貴封奉政大夫明

閻恭博學強記領景泰癸酉鄉薦貧甚好施人或笑之

恭曰我雖貧猶有賴彼無依何忍坐視始終不倦後授同官訓導

張拳性直每面折人過鄰里有勤學力田者恆出貲勸勵之以是人益敬憚永樂間歲饑拳嘆曰有財而坐視民困忍乎乃盡出藏粟賑其鄉縣令李本淨以詩贈之張珍字朝貢宗政子家素封而儉如寒素及中落無愠意後以子淑勵貴膺封階謙卑自牧無改於初鄉黨稱富貴不淫貧賤不移云

張玉拳子成化二年歲大凶人相食玉出米千石賑之有司以聞旌爲義民子廣承父志亦出粟三千石賑饑

人稱世德焉有傳

張顯拳孫性儉樸愛讀書人遇賓興無問親疎必餞贈  
英宗天順間出粟千石賑荒邑令石英贈以序成化八  
年又饑大叅白某勸民捐粟顯請輸三千石白異之贈  
以文

高鼎成化間歲荒鄉人有逃亡者鼎慰留之計口給糧  
全活甚衆以監生任中城兵馬司吏目性聰敏聽斷得  
情

郭瑜家富好施成化間出粟五百石賑饑弟珍亦出粟  
如其數全活甚衆